



---

## ARAUGINTZAKO FORU DEKRETUA

Ogasun, Finantza eta Aurrekontu Saila  
Zerga Araudiaren Zerbitzua  
Esp. zk.: 83/2017

### **Jarduera ekonomikoen gaineko zergaren arautegia bateratzen duen araugintzako foru dekretua.**

Otsailaren 8ko 1/2017 Foru Arauak, Arabako Lurralde Historikoko sektore publikoaren gardentasunaren, herritarren parte hartzearen eta gobernu onarenak, azken xedapenetako bigarreneko 2. idatz zatian baimena ematen dio Diputatuen Kontseiluari foru arauak behar bezala erregularizatuta, argituta eta harmonizatuta biltzen dituzten testu bateratuak onartzeko, eta horietakoak ditugu uztailaren 19ko 43/1989 Foru Araua, jarduera ekonomikoen gaineko zergarena, eta hura aldatzen duten xedapen guztiak.

Araugintzako foru dekretu honen xedea araudi hori bateratzea da, emandako baimenaz baliatuz.

Jarduera ekonomikoen gaineko zergak Arabako Lurralde Historikoan enpresa, lanbide edo arte jarduerak egitea kargatzen du.

Arau honek proportzionaltasun printzipioa errespetatzen du, eta xedapen orokor honen bidez estali nahi den premiari erantzuteko beharrezkoa den arauak ditu. Ez dago xede horretarako beste neurririk hartzaileen eskubideak gutxiago murrizten dituztenik edo hartzaileei betebeharrak gutxiago jartzen dizkietenik.

Ekimen horren bidez, segurtasun juridikoaren printzipioa bermatzen da, eta koherentea da nazioko eta Europar Batasuneko gainerako ordenamendu juridikoarekin.

Araugintzako foru dekretu hau izapidetzean gardentasun irizpidea aplikatu da; printzipio hori urriaren 1eko 39/2015 Legeak, administrazio publikoen administrazio prozedura erkidearenak, arautzen du 129. artikuluan.

Zerga Araudiaren Zerbitzuak horri buruz emandako araugintza eraginaren txostena aztertu da.

Horren ondorioz, Ogasun, Finantza eta Aurrekontu Saileko diputatuak proposatuta eta Diputatuen Kontseiluak gaurko egunean egin duen bileran gaia aztertu ondoren, eta abenduaren 18ko 52/1992 Foru Arauak, Arabako Foru Aldundiaren antolaketa, funtzionamendu eta Araubide Juridikoari buruzkoak, 7. artikuluan Foru Aldundiari ematen dizkion ahalmenez baliatuz, hauxe



## **XEDATZEN DUT:**

Jarduera ekonomikoen gaineko zergaren araudiaren testu bateratua onartzea. Testua eranskinean dago.

### **XEDAPEN GEHIGARRIAK**

#### **Lehenengoa. Araudi indargabetuaren aipamenak.**

Ordenantzetan eta beste xedapen batzuetan agertzen diren uztailearen 19ko 43/1989 Foru Arauaren aipamenak (jarduera ekonomikoen gaineko zergaren foru araua) testu bateratu honetako manuez egintzat hartu behar dira.

#### **Bigarrena. Beste arau aipamen batzuk.**

Beste foru arau batzuetan edo xedapen orokorretan zerga honen foru arauaz egiten diren aipamenak, gaur egun zein hemendik aurrera, araugintzako foru dekretu honetaz egintzat hartu behar dira.

#### **Hirugarrena. Arau aipamenak.**

Araugintzako foru dekretu honi buruzko erreferentziak foru arau kontzeptuari egingo zaizkio hemendik aurrera.

### **XEDAPEN IRAGANKOR BAKARRA. Zerga ordenantzak egokitzeko epealdia.**

Toki erakundeek 2020ko urtarrilaren 1era arteko epealdia edukiko dute zerga ordenantzetan behar diren aldaketak egiteko araugintzako foru honetan ezartzen dena moldatzeko.

### **XEDAPEN INDARGABETZAILE BAKARRA**

Foru arau hau indarrean jartzen denean indargabetuta geratuko dira beraren kontra dauden maila bereko edo beheragoko mailako xedapen guztiak, batez ere uztailearen 19ko 43/1989 Foru Araua, jarduera ekonomikoen gaineko zergarena (salbuespena: xedapen iragankorrak).

Indarrean mantentzen da uztailearen 19ko 43/1989 Foru Arauak emandako ahalmena: batetik, Ekonomia Itunaren eremuaren barruan zehaztea zer administraziok daukan eskumena probintzia mailako kuotak edo probintzia batean baino gehiagotan jarduteko aukera ematen duten kuotak dituzten jarduerak kudeatzeko, likidatzeko, ikuskatzeko eta biltzeko; bestetik, behar den kasuetan, lurralde eskumena edo, bestela, bildutakoaren egozteko ekonomikoa finkatzen duten lotura puntuak ezartzea.

Halaber, indarrean mantentzen da foru arau horrek Arabako Foru Aldundiari emandako baimena: zergaren tarifak eta horien gaineko jarraibideak garatzeko eta aplikatzeko behar diren xedapen guztiak emateko baimena.

### **AZKEN XEDAPENAK**

#### **Lehenengoa. Indarrean jartzea.**



Xedapen orokor hau ALHAOn argitaratu eta hurrengo egunean jarriko da indarrean.

**Bigarrena. Gaitzea.**

Arabako Foru Aldundiari baimena ematen zaio xedapen orokor hau garatzeko eta aplikatzeko behar diren xedapen guztiak emateko.

**Hirugarrena. Batzar Nagusietara bidaltzea.**

Araugintzako foru dekretu honen berri emango zaie Arabako Batzar Nagusiei, indarreko legeriak ezartzen dituen izapideak egin ditzaten.

Vitoria-Gasteiz.

**Ramiro González Vicente**

Diputatu nagusia  
Diputado General

**José Luis Cimiano Ruiz**

Ogasun, Finantza eta Aurrekontu  
Saileko foru diputatua  
Diputado Foral de Hacienda, Finanzas y  
Presupuestos

**Teresa Viguri Martínez**

Ogasun zuzendaria  
Directora de Hacienda

**ERANSKINA**



# JARDUERA EKONOMIKOEN GAINEKO ZERGAREN ARAUTEGIAREN TESTU BATEGINA

## I. KAPITULUA

### Izaera eta zerga gaia

#### 1. artikulua. Izaera.

1. Jarduera ekonomikoen gaineko zerga zuzeneko zerga erreala da. Zerga gaia Arabako Lurralde Historikoan enpresa jarduerak, jarduera profesionalek edo artistikoak egitea da, lokal zehatz batean egin zein ez eta zergaren tarifetan zehaztuta egon zein ez.

2. Zerga honen ondorioetarako, enpresa jarduerak dira: abeltzaintzako jarduerak (lokabea izanez gero), meatzaritzako jarduerak, industria jarduerak, merkataritzako jarduerak eta zerbitzu jarduerak. Beraz, nekazaritzako jarduerak, beste jarduera bati lotutako abeltzaintza, basogintza eta arrantza ez dira enpresa jardueratzat hartuko; horietan aritzea ez da zerga gaia.

Aurreko paragrafoan ezartzen denari dagokionez, abeltzaintza lokabea izango da kasu hauetan:

- a) Abeltzainak abereak larratzen diren lurak ez erabiltzea nekazaritzarako ez basogintzarako.
- b) Ukuiluak landa finketatik kanpo daudenean.
- c) Transhumantzia aritzea.
- d) Abereak gehien bat hazten ari den finkakoak ez diren pentsuez elikatzea.

#### 2. artikulua. Kargapeko jarduera ekonomikoa.

1. Jarduera bat enpresa jarduera, jarduera profesional edo jarduera artistikotzat hartuko da produkzio bitartekoak eta giza baliabideak (edo bietakoren bat) norberaren kabuz antolatzen direnean ondasunen edo zerbitzuen produkzioan edo banaketan parte hartzeko asmoarekin.

2. Kargapeko jarduerak zergaren tarifetan zehaztuko dira.

#### 3. artikulua. Kargapeko jarduera ekonomikoa egiten dela frogatzea.

Zergapeko jarduera egiten dela frogatzeko zuzenbidean onar daitekeen edozein bitarteko erabiliko da eta, bereziki, Merkataritzako Kodeko 3. artikuluan ezartzen direnak.

#### 4. artikulua. Kargapean ez dauden jarduerak.

Jarduera hauek ez daude zergapean:



1. Enpresen aktibo finkoan dauden ondasunak besterentzea, beti ere ondasun horiek ibilgetu moduan era egokian inbentariatuta egon direnean eskualdatu baino urte bi baino lehenago; halaber, ez daude zergapean saltzailearen norbanako erabilera edo erabilera pribaturako ondasunak, beti ere goian adierazi den aldian erabiltzen baditu.
2. Lan pertsonalen edo zerbitzu profesionalen ordain modura jasotzen diren produktuen salmenta.
3. Establezimenduaren apaindurarako baino ez diren artikulua erakustea. Aldiz, bezeroei oparitzeko diren gauzak erakustea zergapean dago.
4. Txikizkako salmentan, egintza edo eragiketa bakarra burutzea.

## II. KAPITULUA

### Salbuespenak

#### 5. artikulua. Salbuespenak.

##### 1. Zergaren kargatik salbuetsita daude:

- a) Estatua, Euskal Autonomia Erkidegoa, Arabako Foru Aldundia eta udal erakundeak, bai eta estatuaren organismo autonomoak eta lurralde administrazio horietako antzeko izaerako zuzenbide publikoko erakundeak.
- b) Jarduera batean hasten diren subjektu pasiboak, hasi eta lehenengo bi zergaldietan.

Honen ondorioetarako, honako kasu hauetan jarduera ez dela hasi pentsatuko da:

- 1) Jarduera lehen beste titulartasun batekin egin bada; halakotzat hartuko dira bategiteak, zatikatzeak eta jarduera arloak eranstea.
  - 2) Subjektu pasiboa Merkataritzako Kodeko 42. artikuluaekin bat etorriz eratutako sozietate talde bateko kidea bada; salbuespena: jarduera berria izatea, aurretik taldeko ezein enpresak egin ez duena.
  - 3) Sozietatearen ehuneko 25 baino gehiago jarduera berean aritu diren enpresen esku badago.
- c) Subjektu pasiboaren eragiketen bolumena 1.000.000 eurotik beherakoa denean.

Ez-egoiliarren errentaren gaineko zergaren zergadunei dagokienez, establezimendu iraunkor bidez aritzen direnentzat baino ez da izango salbuespena, baldin eta eragiketen bolumena 1.000.000 eurotik beherakoa bada.

Edonola ere, salbuespen hori aplikatzeko ezinbestekoa izango da subjektu pasiboek ez edukitzea, ez zuzenean ez zeharka, letra honetan ezartzen den eragiketa bolumenaren baldintza betetzen ez duten enpresen ehuneko 25etik gorako partaidetzarik, salbuespen honekin: arrisku kapitaleko sozietateak eta funtsak, abenduaren 13ko 37/2013 Foru Arauak, sozietateen gaineko zergarenak, 77. artikuluan zehazten dituenak, baldin eta partaidetza sozietateen xedea betetzearen ondoriozkoa bada.



Letra honetan arautzen den salbuespena aplikatzeko erregela hauek hartu behar dira kontuan:

1. Eragiketen bolumena abenduaren 13ko 37/2013 Foru Arauak, sozietateen gaineko zergarenak, 5. artikulua 1. idatz zatian ezartzen duenaren arabera kalkulatu da.

2. Pertsona fisikoaren errentaren gaineko edo sozietateen gaineko zergen subjektu pasiboentzat edo ez-egoiliarren errentaren gaineko zergaren zergadunentzat, eragiketen bolumena izango da zerga horiengatik aitorpenak aurkezteko epealdia zerga sortu aurreko urtean amaitu den zergaldikoa.

Zergen Foru Arau Orokorreko 35. artikuluko 3. idatz zatian aipatzen diren sozietate zibilen eta entitateen kasuan eta testamentu ahalordea edo gozamen ahaldua erabili gabe duten herentzien kasuan, eragiketen bolumena zerga honen sortzapenaren urtearen azken aurreko urtekoa izango da.

Zergaldi hori urtebete baino laburragoa izan bada, eragiketen bolumena urtekoratu egingo da.

3. Subjektu pasiboaren eragiketen bolumenaren zenbatekoa kalkulatzeko, hark egindako jarduera ekonomikoaren multzoa hartuko da kontuan.

Entitatea, Merkataritza Kodeko 42. artikuluari jarraikiz, sozietate talde bateko kidea bada, aurrean adierazitako magnitudeak taldeko entitate guztienak izango dira.

4. Ez-egoiliarren errentaren gaineko zergaren zergadunen kasuan, Espainian dauden establezimendu iraunkorren multzoari egotz dakioken eragiketa bolumena hartuko da kontuan.

d) Gizarte segurantza, mutualitateak eta montepioak kudeatzen dituzten entitateak, indarrean dagoen legeriarekin bat etorritik eratuta daudenak.

e) Ikerkuntza erakunde publikoak eta irakaskuntza establezimenduak (maila guztietan), Estatuko, Euskal Autonomia Erkidegoko eta Arabako Foru Aldundiko udal erakundeetako funtsekin osoki ordainduak; ongintzakotzat aitortutako edo erabilgarritasun publikoa duten fundazioen kontura ere ordainduak; eta maila guztietako irakaskuntza establezimenduak, mozkinik ateratzeko asmorik gabe hezkuntza itunean daudenak (nahiz eta ikasleei liburuak edota mahairako artikulua eman, edota mantenu erdiko zein barnetegi zerbitzuak eskaini), nahiz eta salbuespen gisa, establezimendu berean saldu irakaskuntza horretara zuzendutako tailerretako produktuak; betiere, salmentaren zenbatekoa (partikularentzako edo hirugarren pertsonentzako erabilgarritasunik gabea) eskusiboki lehengaiak eskuratzeko edo establezimendua sostengatzeko bideratzen bada.

f) Mozkina jasotzeko asmorik gabeko ezindu fisiko, psikiko eta sensorialen elkarte eta fundazioak, elbarriei irakatsi eta haiek hezi, birgaitu eta zaintzeko egingo dituzten pedagogia, zientifiko, laguntza eta enplegu izaera duten jarduerak egingo dituztenak, nahiz eta horretarako egokitutako lantegietako produktuak saldu, betiere, salmenta horren zenbatekoa (partikularentzako edo besterentzako erabilgarritasunik gabea) eskusiboki lehengaiak eskuratzeko edo establezimendua sostengatzeko bideratzen bada.

g) Gurutze Gorria eta arauz zehazten diren antzeko beste entitate batzuk.

h) Nazioarteko ituna edo hitzarmena dela bide salbuespena aplikatu dakiekeen subjektu pasiboak.



2. Aurreko idatz zatiko a), d), g) eta h) letretan aipatzen diren subjektu pasiboek ez dute alta aitortpena aurkeztu beharrik zergaren matrikulan.

3. Ogasun, Finantza eta Aurrekontu Saileko diputatuak zehaztuko du aurreko 1. idatz zatiko c) letran zehaztutako salbuespena aplikatzen den kasuetako zeinetan eskatuko den Arabako Foru Aldundiari komunikazioa bidaltzeko, hain zuzen ere letra horretan salbuespena aplikatzeko eskatzen diren baldintzak betetzen direla adierazten duen komunikazioa.

Horretarako, Ogasun, Finantza eta Aurrekontu Saileko foru diputatuak ezarriko du komunikazio horretan zer azaldu behar den, noiz bidali behar den nola aurkeztu behar den, eta zer kasutan aurkeztu behar den bide telematikoz.

Aurreko 1. idatz zatiko c) letran zehazten den salbuespenean eragina eduki dezaketen aldakuntzak direla eta, foru arau honetako 14. artikuluko 2. idatz zatiko hirugarren paragrafoan ezartzen dena aplikatuko da.

4. Artikulu honetako 1. idatz zatiko e) eta f) letretan xedatzen diren salbuespenek erregu izaera izango dute eta, behar denean, alde batek eskatuta emango dira.

### III. KAPITULUA

#### Subjektu pasiboak

##### **6. artikulua. Subjektu pasiboak.**

Zerga honen subjektu pasiboak dira, zergadun gisa, pertsona fisiko eta juridikoak, otsailaren 28ko 6/2005 Foru Arauak, Arabako zergenak, 35. artikuluko 3. idatz zatian aipatzen dituen entitateak, eta testamentu ahalordea edo gozamen ahalorduna erabili gabe duten herentziak, baldin eta zerga honen zerga egitatea sortzen duten jarduerak Arabako Lurralde Historikoan egiten badira.

Testamendu ahalordea edo gozamen ahalorduna erabili gabe duten herentzietan dagokienez, azaroaren 27ko 33/2013 Foru Arauak, pertsona fisikoen errentaren gaineko zergarenak, 24. artikuluko 1. idatz zatian ezartzen duena bete zein ez bete, jarduera ekonomikoa egintzat joko da.

### IV. KAPITULUA

#### Zerga kuota

##### **7. artikulua. Zerga kuota.**

1. Zerga kuota kalkulatzeko zergaren tarifak aplikatuko dira honako hauek kontuan hartuz: foru arau honetako aginduak nahiz hura osatu eta garatzen duten aginduak; zerga ordenantza egokiek arautu eta udal bakoitzak adostutako koefizienteak, indizea eta hobariak.

2. Kuotak ezin izango dira murriztu, honako kasu honetan izan ezik: alta aitortpenen kasuan, jarduera hasten den eguna ez bada urte naturaleko lehen eguna; horrelakoetan, kuotak jarduera hasten den egunetik abenduaren 31ra bitarteko egunen kopuruaren arabera kalkulatuko dira.



Baja aitoren kasuan, kuota urtarrilaren letik baja aitorea aurkeztu arteko hilen kopuruaren proportzioan kalkulatu da.

Aurreko paragrafoan aipatutako hilen kopurua kalkulatzeko, hilabete modura zenbatuko da aitorea aurkeztu den hila.

Zenbaki honetan xedatzen dena ez da aplikatu kasu honetan: jardura hasten den egunetik baja aitorea aurkeztu den egunera arte baldin 12 hilabete pasatu ez badira. Hala denean, baja eguna baja aitorea aurkeztu den urteko abenduaren 31 izango da.

## **8. artikulua. Zergaren tarifak.**

**1.** Zergaren tarifak (gutxieneko kuota finkatzen dituztenak) eta horiek aplikatzeko jarraibideak araugintzako foru dekretuan ezarri dira. Gutxieneko kuota finkatzeko honako oinarri hauek aplikatu dira:

Lehenengoa. Zergapeko jardueren edukia sektore ekonomikoen ezaugarrien arabera mugatzea, jardura horiek, oro har, zergaren sortzapena gertatzean eduki behar dituzten elementu finkoen arabera sailkatuz.

Bigarrena. Zergapeko jarduerak sailkatzen dituzten epigrafe eta idazpuruak Jardura Ekonomikoen Sailkapen Nazionalaren arabera antolatuko dira, ahal den neurrian.

Hirugarrena. Etekin urrikoak izanik kuota zero ezartzen zaien jarduerak edo jardura motak zehaztea.

Laugarrena. Tarifaren aplikazioaren ondoriozko kuota ezin dira izan zergapeko jardueraren ustezko batz besteko mozkinaren ehuneko 15 baino gehiago, eta haiek finkatzean aurreko lehen oinarrian azaltzen denaz gainera zergapeko jardura egiten den lokalaren azalera ere kontuan hartu behar da.

Bosgarrena. Halaber, zergaren tarifetan Arabako Lurralde Historiko osoan aritzeko ordaindu beharreko kuota finkatu ahal izango dira, eta jardueren gaineko kargak kuota horien arabera zer kasutan ordain daitezkeen ezarri ahal izango da eta kuoten zenbatekoak finkatu ahal izango dira, bakoitzaren jardute eremua kontuan hartuta.

**2.** Ekonomia Itunean xedatzen denaren esparruan, zergaren tarifaren arabeko probintziako nahiz Estatuko kuota Arabako Foru Aldundiak ordainaraziko ditu. Hala ere, kudeaketa horretarako lankidetzaren formulak ezarri ahal izango dira. Probintziako nahiz Estatuko kuota horien gainean ezin izango dira ezarri ez koefizienteak, ez egoera indizea, ez foru errekarria (foru arau honetako 9.2, 10. eta 14. artikuluetan arautzen dira, hurrenez hurren).

**3.** Zergaren kuota honako arau hauen arabera ordainarazi eta banatuko dira:

a) Udal kuota gutxienekoak jarduerak egiten diren udalerriko udalak ordainaraziko ditu.





Lokalak, edo lokaltzat hartzen ez diren instalazioak, udalerrri batean baino gehiagotan badaude, lokal edo instalazioen zatirik handiena dagoen udalerriko udalak ordainaraziko du kuota, baina horrek ez du eragotziko kuota horren zenbatekoa gainontzeko udalen artean banatu beharra. Banaketa egiteko, instalazioak edo lokalak udalerrri bakoitzean zenbateko azalera hartzen duen hartuko da kontuan, zergaren tarifak aplikatzeko jarraibideetan eta erregelamendu arauetan ezartzen den moduan.

Argindarra ekoizteko zentral hidraulikoen kasuan, zentralaren instalazioak dauden udalerrrien artean (urtegia alde batera), batetik, eta urtegiak hartzen dituen lurren udalerrrien artean, bestetik, banatuko dira kuotak, zergaren tarifak aplikatzeko jarraibideetan eta erregelamendu arauetan ezartzen den moduan.

b) Jarduera Arabako Lurralde Historikoan eginez gero, kuota probintzialak Arabako Foru Aldundiak ordainaraziko ditu.

Foru Aldundiak kuota horien zenbatekoa Arabako Lurralde Historikoaren udalerrrien artean banatuko du arautegian ezartzen denarekin bat etorritz.

c) Subjektu pasiboaren ohiko etxebizitza edo zerga egoitza Araban badago, Estatuko kuotak Arabako Foru Aldundiak ordainaraziko ditu.

Estatuko kuoten zenbatekoa Arabako Lurralde Historikoko udalerrrien artean banatuko da arautegian ezartzen denarekin bat etorritz.

## **9. artikulua. Haztapan koefizientea.**

1. Udalek zergaren tarifen araberako udal kuotak gehitu ahal izango dituzte subjektu pasiboaren eragiketen bolumenaren araberako haztapan koefizientea aplikatuz.

Zergaren tarifen araberako kuota probintzialei eta estatalei subjektu pasiboaren eragiketen bolumenaren araberako haztapan koefizientea aplikatuko zaie.

Aurreko bi paragrafoetan xedatzen denaren ondorioetarako, haztapan koefizientea honako taula honen arabera zehaztuko da:

<b>Eragiketen bolumena (euroak)</b>	<b>Koefizientea</b>
2.000.000,00 - 6.000.000,00	1,20
6.000.000,01 - 10.000.000,00	1,22
10.000.000,01 - 50.000.000,00	1,24
50.000.000,01 - 100.000.000,00	1,27
100.000.000,00 baino gehiago	1,30



Eragiketarik ez	1,25
-----------------	------

Idatz zati honetan aipatzen den koefizientearen aplikazioa dela eta, subjektu pasiboaren eragiketen bolumena hark egindako jarduera ekonomiko guztiena izango da; foru arau honetako 5. artikuluko 1. idatz zatiko c) letran arautzen den bezala zehaztuko da.

2. Udalek zergaren tarifetako kuotak (edo aurreko idatz zatian arautzen den koefizientearen aplikazioaren ondoriozkoak) aldatu ahal izango dituzte. Horretarako, tarifa bakarra aplikatuko die udalerrian egindako jarduera guztiei edo, bestela, bi koefiziente, bata orokorra eta bestea hobariduna (koefiziente orokorraren ehuneko 15 gehienez), udal ordenantzan berariaz adierazten diren jarduera epigrafe jakin batzuetarako. Koefiziente orokorra ezin da izan 0,8 baino txikiagoa, ez 2,2 baino handiagoa. Udalak koefiziente horiek zehazten ez baditu, 1 koefizientea aplikatuko da. Era berean, udalak jarduera epigrafe baterako edo batzuetarako koefizientea finkatzen badu eta beste batzuetarako ez, koefizienterik finkatu ez zaienei 1 aplikatuko zaie.

#### **10. artikulua. Kokapen koefizientea.**

1. Aurreko artikuluan arautzen diren koefizienteek gainera, udalek lokalen kokapenaren arabera indizeak (lokala udalerrian dagoen lekuaren arabera indizea; hau da, lokala dagoen kalearen kategoriaren arabera) aplikatu ahal izango dizkie gutxieneko kuotei (edo koefizienteak aplikatuz aldatutako kuotei).

2. Koefiziente hori ezin da izan 0,5 baino txikiagoa, ez 2 baino handiagoa. Udalak koefiziente horren eskala zehazten ez badu, 1 koefizientea aplikatuko zaie lokal guztiei.

#### **11. artikulua. Hobariak.**

1. Zerga ordenantzek ezarritik gero, honako hobari hauek aplikatuko dira zergaren kuotan:

a) Kooperatibentzat eta haien batasun, federazio eta konfederazioentzat Kooperatiben zerga araubidearen Foru Arauan ezartzen den hobaria.

b) Udal kuota batekin kargatzen den jarduera ekonomiko bati ekiten diotenek ehuneko 50eko hobaria aplikatu ahal izango dute jarduera egiten duten bigarren zergaldia amaitu ondoko lehen bost urteetan.

Jarduera ekonomikoa lehenago beste titulartasun batekin egin bada, ezin aplikatu izango da hobaria. Jarduera lehenago beste titulartasun batekin egintzat joko da kasu hauetan, besteak beste: bategitea, bereizketa eta jardueraren arlo gehikuntza.

Hobaria aplikatzeko aldia foru arau honetako 5. artikuluko 1. idatz zatiko b) letran arautzen den salbuespena amaitzen denetik bost urte pasatutakoan amaituko da.

Hobaria zerga kuotari aplikatuko zaio, hau da, foru arau honetako 9. eta 10. artikuluetan arautzen diren koefizienteen eta indizeen bidez haztatutako tarifa kuotari. Idatz zati honetako a) letrako hobaria aplikatu ahal izanez gero, letra honetako hobaria a) letrakoaren aplikazioaren ondoriozko kuotari aplikatuko zaio.



c) Hobaria enplegua sortzeagatik, kuotaren ehuneko 50era artekoa, hain zuzen, zerga udal kuoten arabera ordaintzen duten subjektu pasiboentzat, baldin eta hobaria aplikatu ahal den zergaldiaren aurre-aurreko zergaldian kontratu mugagabeko langileen batez besteko kopurua handitu badute zergaldi haren aurrekoaren aldean.

Zerga ordenantzan hainbat hobari ehuneko ezarri ahal izango dira kontratu mugagabeko langileen batez besteko gehikuntzaren arabera, aurreko paragrafoan ezarritako gehieneko muga gainditu gabe.

Hobaria aurreko letretako hobariak aplikatzearen emaitzako kuotari aplikatuko zaio.

d) Kuotaren ehuneko 50era arteko hobaria zerga udal kuoten arabera ordaintzen duten subjektu pasiboentzat, baldin eta:

- Energia berriztagarriak aprobetxatzeko instalazioekin edota baterako sorkuntzako sistemekin ekoiztiko energia erabiltzen edo ekoizten badute.

Hori dela eta, energia berriztagarria sustatzeko planean energia berriztagarriak aprobetxatzeko instalaziotzat jotzen eta definitzen direnak hartuko dira halakotzat. Baterako sorkuntzako sistematzat joko dira argindarra eta energia termiko erabilgarria batera ekoiztea ahalbidetzen duten ekipo eta sistemak.

- Industria jarduerak udalerriko zona populatuenetatik urruti dauden lokaletan edo instalazioetan egiten badituzte, jardueraren hasieratik edota gero tokiz aldatuta.

- Lantokirako joan-etorriek eragiten duten energia kontsumoa eta isurtzeak murrizteko eta garraio bide eraginkorrakoak (kasurako, garraio kolektiboa edo partekatua) erabiltzeko plana ezartzen badute langileentzat.

Hobaria aurreko letretako hobariak aplikatzearen emaitzako kuotari aplikatuko zaio.

e) Kuotaren ehuneko 50 arteko hobaria zerga udal kuoten arabera ordaintzen duten subjektu pasiboentzat, baldin aurreko ekitaldiko jarduera ekonomikoaren etekin garbia edo errenta negatiboa edo zerga ordenantzan zehazten den kopurua baino gutxiago bada. Ordenantza horretan hainbat hobari ehuneko eta muga ezarri ahal izango dira jarduera ekonomikoa sailkatzen den zergaren sailaren, taldearen edo multzoaren arabera.

Hobaria aurreko letretako hobariak aplikatzearen emaitzako kuotari aplikatuko zaio.

**2.** Aurreko paragrafoan adierazten diren edukiko nahiz formako gainerako alderdiak zerga ordenantza batean zehaztuko dira. Besteak beste, zerga ordenantza horretan zehaztuko da hobariak (batzuk edo guztiak) aldi berean aplikatu daitezkeen ala ez.

## V. KAPITULUA

### Zergaldia eta sortzapena

#### **12. artikulua. Zergaldia.**



1. Zergaldia urte naturala da; salbuespena: alta aitorpenetan zergaldia jarduerari ekin zaionetik egutegiko urtea amaitu arteko aldia da.

2. Baja aitorpenetan zergaldia urtarrilaren 1etik baja aitorpena aurkezten den egunera arteko aldia izango da, foru arau honetako 7. artikuluan xedatzen dena kontuan hartuz.

### **13. artikulua. Sortzapena.**

1. Zerga zergaldiko lehen egunean sortzen da, eta kuotak ezin izango dira murriztu, honako kasu honetan izan ezik: alta aitorpenen kasuan, jarduera ez bada hasten urte naturaleko lehen egunean; horrelakoetan, kuotak jarduera hasten den egunetik abenduaren 31ra arteko aldiko egunen kopuruaren arabera kalkulatu dira.

2. Baja aitorpenen kasuan ere zerga zergaldiko lehen egunean sortzen da.

3. Ikuskizunak direnean, kuotak jarduketa bakarretarako ezartzen badira, sortzapena haietariko bakoitza egiten denean gertatuko da, eta horiei dagozkien aitorpenak arautegian ezartzen den bezala aurkeztu beharko dira.

## **VI. KAPITULUA**

### **Kudeaketa**

#### **14. artikulua. Zergaren kudeaketa.**

1. Zerga bere matrikularen bidez kudeatzen da. Matrikula hori urtero egingo da udalerrri bakoitzean; jarduera ekonomikoan, subjektu pasiboan, zerga zorren eta (behar denean) foru errekaraguen zentsuak izango dira. Matrikula jendearen esku egongo da udaletxean.

2. Subjektu pasiboek alta aitorpenak aurkeztu beharko dituzte arau bidez ezartzen den epealdiaren barruan; aitorpen horietan aurreko idatz zatian azaltzen denaren arabera matrikulan sartu beharreko elementu guztiak adierazi beharko dituzte. Ondoren administrazio eskudunak bidezko likidazioa egingo du eta subjektu pasiboari jakinaraziko dio, eta gero hark bidezko diru kopurua sartu beharko du.

Halaber, subjektu pasiboek zergapeko jardueretan aritzean gertatu eta zerga honen ordainketan eragina duten aldaketa fisiko, ekonomiko eta juridikoen berri eman beharko dute, arau bidez ezartzen diren epealdietan eta zehazten den bezala. Hori dela eta, berriemateetan nahitaez adierazi beharko da jarduera egiten den higiezinaren katastroko erreferentzia.

Hain zuzen ere, foru arau honetako 5. artikuluko 1. idatz zatiko c) letran zehaztutako salbuespena aplikatu ezin zaien zergadunek beren eragiketen bolumena adierazi beharko diote Arabako Foru Aldundiari. Era berean, subjektu pasiboek eragiketen bolumenean gertatutako aldakuntzen berri eman beharko dute, baldin eta aldakuntzak berekin badakar foru arau honetako 5. artikuluko 1. idatz zatiko c) letran zehaztutako salbuespena aplikatzearen edo ez aplikatzearen aldaketa, nahiz eta foru arau honetako 9. artikuluko 1. idatz zatian zehaztutako haztaketa koefizientea aplikatzearen ondorioetarako



kontuan izan beharreko zatiko aldaketa. Ogasun, Finantza eta Aurrekontu Saileko buruak zehaztuko du zer kasutan aurkeztu beharko diren jakinarazpen horiek, horien edukia finkatuko du eta noiz eta nola aurkeztu behar diren ezarriko du, bai eta baliabide telematikoen bidez zer kasutan aurkeztu beharko diren ere bai.

**3.** Administrazio egintzat jotzen diren zentsu aldaketaren eragile izango dira zentsuetan datuak sartzea, kentzea edo aldatzea, baldin eta zerga ikuskatzeen edo alta emate eta komunikazio formalizatuen ondorio badira. Matrikulan egiten den aldaketa batek zentsu bateko daturen bat ukitzen badu, lehenbizi ildo bereko aldaketa egin beharko da datu horretan, nahitaez.

**4.** Zerga hau autolikidazio bidez eskatu ahal izango da; hala bada, arau bidez ezarriko da nola.

### **15. artikulua. Zergaren matrikula.**

**1.** Foru Aldundiak egingo ditu udalen matrikulak; bakoitzari berea bidaliko dio.

**2.** Matrikula jaso ondoren udalak jendaurrean jarri beharko du hamabost egunez, zergadunek aztertu eta, nahi izatera, bidezkoztat jotzen dituzten erreklamazioak aurkez ditzaten.

**3.** Jendaurreko agerraldia amaitu eta erreklamazioak ebatzi ondoren emaitzen ziurtagiria bidaliko zaio Foru Aldundiari, onar dezan.

**4.** Ziurtagiria onartu eta gero Arabako Foru Aldundiak bidezko ordainagiriak prestatuko ditu, eta gero udal bakoitzari berea bidaliko dio, zerga bilketari ekin diezaion.

### **16. artikulua. Udalen eskumena.**

**1.** Udalek eskumena dute zerga kudeatzeko, likidatzeko, ikuskatzeko eta biltzeko, bai borondatezko aldian, bai premiamendu bidean.

**2.** Udalek honako egiteko hauek dituzte beren eskumeneko esparruan: matrikula jendaurrean jartzea, errekursoak eta erreklamazioak ebatzea, zerga kobratzea, salbuespenak eta hobariak aplikatzea, eta zergadunei zergaren inguruko laguntza eta informazioa emateko lanak egitea.

**3.** Honako hauek, aldiz, Foru Aldundiaren ez beste inoren egitekoak dira: matrikulak egitea eta gordetzea, jarduera ekonomikoak sailkatzea, kuotak jartzea, eta bidezko ordainagiriak egitea.

**4.** Udalek zergaren matrikula egiten eta artatzen lagunduko diote Foru Aldundiari, eta jarduera ekonomikoak sailkatzen eta bidezko kuotak ezartzen ere bai.

**5.** Salbuespenak emateko eta ukatzeko ezinbestekoa da hartutako ebazpena Foru Aldundiari jakinaraztea.

### **17. artikulua. Errekurtsoak eta erreklamazioak.**

Jarduerak sailkatzeko eta kuotak ezartzeko egintzen aurkako errekursoak eta erreklamazioak direla eta, Zergen Foru Arau Orokorrak 229 – 246 arteko artikuluetan xedatzen duena aplikatuko da. Arabako Foru Aldundia izango da horrelako errekursoak eta erreklamazioak ebatzeko organo eskuduna. Horrelako erreklamazioa aurkezteak ez du etengo egintzen betearazpena.